

Dakilang Asul

JOSEPH

MAYNILA
1907



DAKILANG ASAL

TINULA

NI


Aurelio Tolentino



MAYNILA

1907







DAKILANG

ASAL

TINULA NI

...Aurelio Tolentino...



MAYNILA

Imp. "Tagumpay" 15, Plaza Sta. Cruz

1907





TAGUBILIN

Ang aklat na itó ay aring tunay nḡ tumulâ.
Walâ sinu pa mang makapagpapalimbag nḡ siya'y
walang kapahintulutang lubos, sapagka't mahigpit
na pag-uusigin sa harap nḡ mḡa kautusang umiiral.



DAKILANG ASAL ⁽¹⁾

I

PAUNAWA

O kabinataang bagong sumisibol,
itong abang lagda sa iyo'y patunkol.
Pakatandaan mo itong mga hatol
na dangal at buhay ng lahat ng dunong.

Ang pagpipitaga't pakikipagkapua
ay siyang sagisag ng pagka-dakila:
kapag sa sinuman ito ay nawala,
iyan ay di dapat humarap sa madla.

Di sukat ang ganda, di sukat ang yaman,
di sukat ang dunong at lahat ng inam;
kapag ang sagisag na aking tinuran
ay siyang nawala, ang lahat ay kulang.

Ang pagkamabait, ang pagka-mahinhin,
ang pagka-matapat at anyong butihin
ay siyang palamuting sa tuina'y dadalhin,
ang iyong ugali upang magluninguin.

Sapul pa ng ikaw ay batang maliit
may tuungkulin ka ng lubhang mahihigpit,
gaya ng huag bigyan ng munting ligalig
ang kawawang inang sa iyo'y ninibig.

Ikaw ay lumaki at lumaki naman
ang iyong tunkuliag akin ng tinuran:
ng una'y ang iyong mundo ay kandungan
ng inang malugod, ngayon ay ang bayan.

(1) Ang DAKILANG ASAL na ito ay akma sa lahat
ng marangal na ugali sa Sanglibutan.

II

KATUNGKULAN SA MĠA MAGULANG, MAESTRO,
KAPATID, KAMAGANAK AT SA LAHAT
NĠ KAPWA

Pipintuhin mo't panuyuang kusa
ang iyong magulang na mapag-aruga,
sila'y pangalawa ni Poong Bathala
na dapat igalang sa balat nĠ lupa.

¿May mahal pa kaya sa hiningang tanġan?
Ang iyong hininga sa kanila'y utang.
Ang pinagpalaki sa iyo'y paghirang,
puyat, pawis, hirap at sampu nĠ buhay.

Ang kahima't sila ay nangahihimġing.
kapag nainġit ka sila'y gumigising:
kinandong-kandong ka at inaliw-aliw
at pinalayawan nĠ saganang lambing.

Sa gayong kalaking utang na tinangap
mo nĠa sa kanila'y ¿anong ibabayad?
Alayan man sila nĠ lahat nĠ lingap,
kulang at sa utang mo nĠa'y di pa sukat.

Salamat na lamang at di maniningil,
ang puhunan nila'y di ibig bawiin;
sakali ma't sila ay alalahanin
nĠ kahit bahagya'y, malaki nĠ turing.

Pagkagising mo na ay agad nĠ hagkar
ang pisnġi nĠ ina't ang sa amang kamay,
kasabay nĠ bating malugod na—"Inay!"
sa ama'y gayon din, ang bati ay "Tatay!"

Kung matutulug na saka uulitin
ang halik at bating paalam nĠ lambing;
nġuni't sa tui-tui na ito'y bago gawin,
ang kailaġan nila muna'y siyasatin.

Kung sakaling ikaw ay mapangusapan,
sa ano mang bagay kaya'y parusahan,

ay ipagsayá mo't darating ang araw
na matutunayang iyo'y pagmamahal.

Ang mġa inali, at ang mġa mama,
at ang ina-ama, t ini-ina kaya,
at ang mġa nuno, at ang matatanda
ay kailagang lubos na pintuhuín nġa.

At ang mġa iyong lahat na kapatid
ay pakamahalin nġ boong pag-ibig;
sa mġa alila ay huag magmasunġit
pagka't sila'y kapua, dukha lamang tikis.

Sa lahat nġ tao'y lubos magpitagan,
nġ upanding ikaw naman ay igalang;
sakaling sa iyo sino ma'y magkulang,
kahabagan siya't pagdaka'y talikdan.

Ang maestro'y siyang paġalawang ama,
ang maestra nama'y paġalawang ina,
kaya dapat nġaning pintuhuín sila
at mahaling lubos nġ boong pagsinta.

Binalankas lamang, kung бага sa bahay,
ang iyong ugali nġ iyong magulang;
nġuni't ang maestro'y siyang nagbibigay
nġ dakilang gangda't mġa kasangkapan.

Dahil sa kanila ay maihaharap
ang iyong ugali sa sino mang pantas,
sa pagka't sa dunong ay hindi nġa salat,
sa lusok na asal nama'y hindi hubad.

At katungkulan mong lubos na mahigpit
sa iyong pag-aaral ang pagsusumakit;
ang lahat nġ turo nila'y isa-isip,
sa labat nġ hatol nila ay manalig.

Nanġunġuna sila't ang dala ay ilaw
sa landas nġ iyong madilim na buhay;
tanang hakbang nila ay malapit sundan,
nġ upanding ikaw ay huag maligaw.

III

SA PAGLILINIS NĠ KATAWAN AT PAG-AYOS
NĠ BAHAY

Pagbabanġon mo na'y agad maghilamos,
magpunas nġ kamay at saka magmumog,
maglinis nġ nġipin, maghusay nġ buhok,
damit na pangbahay pagdaka'y isuot.

Pagkatapos nito ay agad ganapin
ang datihang iyong katunkulang gawin,
at maminsan minsay ang kuko'y putulin
at saka maligong magkubli sa tinġin.

Ang babayi'y dapat ayusin ang bahay,
linisin ang sahig sampong kasangkapan;
sa kani-kaniyang dako ay ilagay
ang lalong maliit na ari-arian.

Bahay na maayos ay parang salamin
nġ nġgawing buhay sa pagka-mahinhin;
bahay na magulo'y nagsasabing tambing
nġ ugaling salat sa turong magaling.

Kailanġang harapi't siyasating lahat
ang sa pamamahay gawang nararapat,
at huag sayanġin ang kahit sang oras,
magagawa nġayo'y huag ipagpabukas.

Mġa kasangkapan iyong magagamit,
kung saan kinuha ay isawling saglit;
huag pabayaang masira't mawaglit,
pinuhunan dian ay maraming pawis.

Ang itak, ang sandok, ang saro, ang, pingan,
ang walis, pamunas, lamesa't upuan,
tanang kasangkapan kaliit liitan
may kanikaniyang dapat na kalagyan.

Makita mo'y kahit iisang karayom
na kakalat-kalat ó kaya natapon,
pulutin mo agad at ilagay doon
sa kung saan dapat, sa lalagyang ukol.

Karayum ay mura't walang kasaysayan,
n̄guni't hindi ito ang siyang kahulugan:
karayum na walá sa dapat kalagyan
ay nagbabalitang musmos ang may-bahay.

IV

SA PAGBIBIHIS

Ang damit na iyong dapat na isuot
ay huag ang masagwa't huag ang dukhang lubos:
ang tipon n̄ ganda't inam na tibubos
na sa katamtamang sa kulay ay ayos.

Kailan̄gang sumunod sa ugaling moda,
n̄guni't huag lumampas n̄ di tawanan ka,
at huag kang magsuot n̄ hindi mo kaya:
ang mahal ay pangit sa dukhang talaga.

Paka-ingatan mo ang iyong pananamit,
n̄ huag madun̄gisang at n̄ di mapunit;
mainam ang luma, kung buo,t malinis,
kay sa bagong wasak ó may duming bahid.

Marikit ang murang hiyas kay sa mahal,
kung ang gumagamit ay dukha n̄gang tunay:
ang dukhang magsuot n̄ aring maringal
kahit man binili, parang hiram lamang.

Kahit na sa bahay ay dapat magsuot
n̄ damit na puting talagang pangloob,
at huag mong gayahan ang asal na buktot
sa gawing *malinaw*... ¡Hubu't hubad halos!

Limutin ang cotso, at magbotitos ka,
ang paa mo't binti upang huag makita:
babaying may puri di dapat magtinda
n̄ dapat itago sa alin mang mata.

Botitos ay mura, bukod sa mainam,
at talagang dapat sa mahinhing asal;
cotso't sapatilya ay napakamahal,
sa may hiyang paa talagang di bagay.

Di mo masasabing mahal na tibubos,
sapagka,t matibay kung gawang tagalog:

ang tatlo mang cotso'y masisirang sunod
bago makawasak n̄g isang botitos.

At gayon-din naman ang medias ay mura,
n̄guni at mahal ma'y dapat bumili ka:
iyan n̄ga ang tabing, sa mata n̄g iba,
n̄g binting ma'y dan̄gal at ma'y puring paa.

Maging sa bahay ma't maging sa lansan̄gan
ay huag mong limutin ang panyong alampay:
alampay ay siyang tabing na tangulan
n̄g dibdib-mu't batok sa mata n̄g bayan.

Kalsonsilyong puti na hahangang tuhod
ay dapat gamiting damit na pangloob,
ang puri mo'y upang di sumabog-sabog
sa m̄ga hagdana't lilipatang bakod.

Ang tapis ay huag mong limutin kailan man,
sa bihis tagalog sadyang kasangkapan:
ang baro at saya kahit mura lamang
ay áko n̄g tapis, kung ma'y sadyang inam.

Huag kang maniwalang nagbuhat ang tapis
sa kakastilaang dito ay sumapit:
m̄ga nuno natin n̄g *tapi'y* gumamit,
tapis ay nangaling sa *taping* binangit.

Paka-inḡatan mo ang gawang magbihis,
ang sam̄a at buti'y dian masisilip;
diyan nahahayag ang tinagong bait,
diyan nababasa ang gawi at hilig.

V

SA PAKIKIPANAYAM

Sa lahat n̄g m̄ga pakikipanayam
ang nagsásalita'y mabuting pakingan,
sapagka at lubhaug kapan̄git-panḡitan
ang di pumapasing sa kasalitaan.

Ikaw ay papakli, kung dapat sumagot,
n̄g magandang bigkás, salitang malambot:

ang banlang sabihin ay kuruing lubos,
baka may mapaltik sa mġa kaumpok.

Huag magbulaan sa alin mang bagay,
palatuntunan mo'y ang katotohanan;
ngunit sa taya mo'y kung may tatamaan,
mabuti pa nganing huag ka ng magsaysay.

Huag mong sasabatin ang nagsasalita
paka-ilagan mo ang gawang manumpa,
at kung tatawa ka'y huag lakasang lubha
ang tawang malakas ay sa taong dusta.

Kung ma'y nagsasabi ng salitang búhay,
batid mo man kahi't ay dapat pakingan,
at huag mong sabihing—*"Alam ku na iyan"*
ito ay malaking lubhang kapintasan.

Magpakailan pa man ay huag kang sumabat
ng wikang—*"Mali ka"*—*"Sabi mo'y di tapat"*
Sakali mang mali ang ating kausap,
kailangang sagutin ng lubhang banayad.

Ang pakli'y ganito—*"Naging iba lamang,
at hindi pu kayo ang siyang nagsaysay
ng gayon, ay diko paniniwalaan"*
sapagka't.... Saka ka naman mangatwiran.

Kung ang katalo mo ay ayaw duminig
sa sinasabi mong tunay na matwid,
at sumasagot pang bagkus nagagalit,
hayaan mo siya't, huag ka ng umimik.

Datapua't sakaling ang makausap mo
ay sadyang mabait, talagang may tuto,
at sa iyo'y sabihing—*"Ipatawad ninyo
itong ipapakling abang palagay ko"*.

Ito'y sagutin mo ng boong pitagan,
ng boong pag-giliw, gaya ng tuturan
*Ituluy pu ninyo't kikilanling utang
ang pag-akay ninyo sa aking kamalian"*.

At magpakailan man ay huag mong sabihing
"Ang sabi, o'y hindi ninyo napagliling".

Kung di ang ganito—“*Malabu marahil
ang sinalaysay ko: aking uulitin*”.

Kung saka-sakaling purihin ka naman,
ay huag mong sagutin ng wikang mahalay,
na gaya ng pakling—“*Iyan po'y tuya lamang,
iyan po'y isang biro't kasinungalingan*”.

Ganito ang iyong mga sasabihin
—“*Iyan po'y karanġalang di sukat sa akin;
ngunit dahil diya,y aking pipiliting
ang pagkamusmus o'y papaging-dapatin*”.

Ang bagay na lihim ay huag mong ihayag,
at sa kata-kata ikaw ay umilag,
at huag mong purihin ang iyong kausap,
at huag mong libakin ang di mo kaharap.

VI

SA MGA PAGDALAW AT MGA KAPISANAN

Piliin ang oras sa mga pagdalaw,
at di ang sa gawing pagkaing agahan,
di ang sa tanghali, di ang sa hapunan,
di ang sa pagtulog at gawang kailangan.

Mga karaniwang dalaw ay sa pista,
sa araw ng lingo kung walang gambala,
at ang oras namang pinaka-maganda
ay kung ang hapunan ay naidaos na.

Ang dalaw na mga *bigay-loob* lamang—(2)
ay dapat humiksi, ang gayo,y kailagan,
at pagpilitan mo ang huag magpaliban
ng lubhang maluat at iyong bayaran.

Sa alin mang pintô bago ka pumasok
ay huag magmadali't marahang tumugtog;
ang dinadalaw mo'y sakaling nanaog,
ikaw ay magsabi ng ganitong ayos.

(2) Dalaw na *bigay-loob* ay ang unang pagdalaw sa
isang nagaanyayang dalawin sa kaniyang pama-
mahay.

—“*Wala pu ba naman silang dinaramdam?*”
Pagsagot ng wala—“*Salamat na lamang*”
—“*Utang na loob po’y ipagbigay alam sa kanila itong ninais long dalaw*”.

—“*At tuloy kami po’y ipag-maka-anó*---[3]
sa kanilang dangal”. Nguni’t kung sa iyo sabihin ang gayon, ang isasagut mo’y
—“*Aking tutuparin ang utus pu ninyo*”.

Sa gayo’y agad ng ikaw ay magpaalam, isa mong tarheta’y huag na di mag-iwan; baliin ang isang sulok na alin man
—“*Utang na loob po, ito ay iiwan*”. (4)

Sakaling marami ang mga panauhin, yukuan mo sila’t pagdakay batiin—(5)
—“*Magandang gabi po*” — ang iyong sabihin, saka ang may bahay ay lapitang tambing.

Pagdakay iabot ang kanan mong kamay, at ang kamay niya’y upang mahawakan,
—“*Anu po ang atin?*” *Ang inyong may bahay at mga kasama anu po ang lagay?*”

—“*Mabuti po naman at walang may sakit, at ikayu pu naman?*”—Ang sagot ay—*kahit sa alin mang oras ay handa pong tikis na mapag-utusan sa kayang maliit*.”

Kung may kasama kang di kilalang tao ng iyong kausap, agad iharap mo,

(3) Ang salitang *ipagmaka-anó* ay siyang katuranan sa tagalog na dalisay ng maling salitang “*cumusta*” na nangaling sa wikang kastilang “*¿Como está?*”

(4) Ang kahulugan ng bali ng tarheta sa alin mang apat na sulok ay dalaw.

(5) Hindi ang pagyukung pangit na anaki ay natatakot ó nahihiya, kung di yaong magandang kilos na bahagyang hutok ng baiwang, kaunting pagbaba ng ulo at masayang mukha.

—“*Sila po’y kaibigan: ikadadangal lo ang sila’y iharap ngayon po sa inyo.*”

At ang ini harap naman ay sasagot

—“*Bagong tagasuyong napahihinuhod at sumasa-inyong balang ipag-utos*”

—“*Salamat po’t kami ay gayon ding lubos*”—[6]

Kung may kaibigan ka sa m̃ga dadatnan, ang iyong kasama’y iharap din naman; datapua’t huag mong gagawin kailan man, ang di mo kilala’y agad kakamayan.

Lalo at marami ay lubha ñgang pangit na sa bawa’t isa ikaw ay lumapit; yukuan mo lamang sila ñg marikit saka mo batiin ñg boong pag-ibig.—

Ang kasangkapan mo’y sakaling batiin, ialay mo agad ñg wikang magiliw.

—“*Walang kasaysayan, palibhasa’y akin, ñgunil ang akin po’y lubos na inyo rin.*”

Ang iyong kausap kung hindi mo alila ay ipauna mo sa pagsasalita:

“*Kayo po at ako*”—at di mawiwika ang—“*Ako po’t kayo*”—pagka’t hindi tama.

At kung marami ñga ay gayon din naman, ikaw din ang siyang kahuli-hulihan.

Ganito:—“*Kayo po, si Mameng, si Ninay, si Pepe at a.o ang napagtanuñgan.*”

(6) Ang salitang “KAMI” ay nagagamit ñg kahit iisa’t walang kasama, at siyang palaging kagamitan ñg m̃ga marikit managalog, gaya rin ñg salitang “SILA” na ginagamit at ipinapalit sa salitang “KAYO” Sa katunayan ñga ay marikit pakingan ang PAALAM NA PU KAMI SA KANILA” kay sa “PAALAM NA PU AKO SA INYO”. Marikit pakingan ang “*Magtuloy po SILA dine sa AMIN*” “Kay sa “*Magtuloy pu KAYO dini sa AKIN*”.

Ang mġa pamagat ay huag mong sambitin,
lalo na kung pangit at masamang dingin,
na gáya nġa nito:—*“Si Daniel na duling,
si Titay na bungġi, si Kulas na tikling”*

Mġa halintulad ay paka-ilagan
kung nakadudusta—*Aku po’y nawalan:
halimbawa nġayon kayo ang nagnakaw“ . . .*
ang gayong salita’y kasama-samaan.

Sa mġa palalo ay huag kang gumaya,
walang buwang bibig kung di ang kanila:
—*“Ako po’y ganito”*—*“Ako po ay iba”*
Ang gayon salita’y pangit na talaga.

Kung ang kausap mo ó sinu man kayâ
ay namaling hindi talagang sinadya,
pagtakpan mo’t parang hindi nahalata
nġ upanding siya ay huag mapahiya.

Pakikipagtalo ay iyong ilagan;
nġuni at sakaling mahirap iwasan,
ay salaysayin mo ang iyong katwiran
nġ sabling malambot at katotohanan.

Kung paupuin ka ay iyong piliin
ang huling upuan: nġunit kung sakaling
ang lusok na dako sa iyo’y ihain,
ay huag kang magtuloy kung di ka pilitin.

Kung isang babayi ang siyang dadatal
lahat nġ dadatna’y dapat magtindigan;
sagutin ang bating kaniyang binitiwang,
lusok na upuan sa kanya’y ialay.

Nġunit kung lalaki ang siyang darating,
ay lalaki lamang ang tatayong tanging;
ang mġa babayi’y nangaka-upu ring
sasagot sa bati nġ wikang magiliw.

Dapat na maunang mag-alay nġ kamay
ang nakatataas sa pagkakamayan;
sa mġa batian ay gayon din naman,
’di sukat mauna ang natataasan.

Kaya ang babayi'y siyang nararapat mag-alay ng kamay sa makakau-sap sapagka't saan mang mga paghaharap, ang babayi'y siya ang nakatataas.

Gayon man ay dito'y nakagawian na ang mga lalaki'y siyang nangunguna. Babayi't lalaki kung kakamayan ka, kamay mo'y madaling ibigay pagdaka.

Inġatan mong ikaw ay huag magdaan sa gitna ng kahit alin mang harapan; nguni at sakaling lubos na kailangan, hingin ang kanilang kapahintulutan.

At huag kang humukut na gaya ng iba na ang kanang kamay ay iniu-una: tuid ang katawan "*Maari pu bagang ako ay magdaan?*"—"*Magtuluy pu sila.*"

At sakaling ikaw nama'y may gagawing sandali sa labas, ay iyong sabihin ng boong pitagan—"*Ipagpaumanhin pu nila't sandaling sila'y lilisanin*"

Sa pagpapa-alam ay iyong magagamit ang mga sinabing pag-upo't pagtindig; at kung ikaw naman ang siyang aalis, sila ay yukuan ng anyong marikit.

—"*Kami pu,y paalam sa kanilang lahat, mag-utus pu sila sa lahat ng oras*"

—"*Magandang gabi po*" Kamayan mo agad ang mga may bahay, gayari ang saad.

—"*Ang amin pung dampa ay inyo ring tunay* (7) *na sa gayong daan at gayon ang bilang. Hinihintay naming lami'y parangalang palagi ng inyong malugod na dalaw.*

(7) Kung hindi pa nalalaman ng pinagpapa-alaman ang pangalan ng nagpapa-alam, ay kailangau sabihin.

Sagot ng may bahay naman ay ganito:
—“Inyo na pung alam itong bahay ninyo.
*Ninana is namang kayo, y pumarito,
upang sa tui-tui na, y masuyuan kayo’.*,”

Nasabing may bahay kung sadyang may nais
makipagkilala sa iyo ng mahigpit,
katungkulan niyang dalawin kang tikis
sa loob ng tatlong araw di lalabis.

At sakaling siya sa iyo’y dadalaw,
ikaw sa kaniya ay magkakautang;
tadhana’y sa loob ng wawalong araw
siya’y dalawin mo’t itoy karampatan.

Kung uubuhin ka ó babahin kayá,
gayon sa pagdahak saka sa paglura,
ay dapat lumingon sa dakong kabila,
ang iyong kailangan upanding magawa.

Kublihan pagdaka ng panyo ang bibig,
upanding ang dumi ay huag tumilansik:
ang mukha mot labi’y pahirang malinis,
at kailan may huag kan lumura sa sahig.

Sa lahat ng pulong ay lubos na bawal
ang pagsasalita ng mga mahalay,
gayon din ang bulok na kadumal dumal
ay huag mong sabihin at paka-ingatan.

At huag kang mag-higab, at huag mag-antók
at huag kang mag-nnat, at huag mag-kamót,
at huag kang mainip at lumingos-lingos,
ito’y lubhang pangit at lisa sa ayos.

Ang anu mang tangán ng iyong kaharap,
na gaya ng paypay, sakaling malaglag,
pulutin pagdaka’t isauli mo agad,
iabot ang tatangnan, sa dulo ang hawak.

Ang alin mang pintong iyong dadaanan,
kung datnan mong hukás, bukás mo ring iwan,
at kung nakasima, isima mo naman,
ito’y siyang turo ng dakilang asal.

Ang kahit sinu man sa m̃ga kalikom
sa alin mang pinto, ay makasalubong,
dagli mong yukuan at saka umurong,
at iyong sabihing—"Sila po'y magtuloy"

Ngunit kung sakaling umurong din siya
at pipilitin kang ikaw ang mauna,
kung hindi rin lamang natataasan ka,
pasalamatan mo at magtuloy ka na.

Ang kahit man sino ang sa iyo'y dumalaw
ay iyong ihatid hangang sa hagdanan:
sákalang madilim ay iyóng tanglawan
hangang na sa loob siya ñg bakuran.

Ang iyong kaibiga'y kung magkakasakit,
ay manaka-nakang dala in mong saglit;
at kung datean siya ñg m̃ga ligalig,
gayon di'y dalawin, aliwin sa hapis,

Sa araw ñg binyag ó kapanġanakan
ñg iyong matalik na m̃ga kaibigan,
sila'y batian mo ñg masayang liham,
mahiksi ang sukat, ñguni at malaman.

At gayon din naman sa pag-aasawa,
ó sa pangānġanak na lubhang ginhawa,
at sa lahat na ñgang dapat ipag-sayá,
sila ay padalhan ñg liham pagdaka.—(8)

Kung patutungo ka sa alin mang bayan,
lalo't sa malayo'y lubos na kailānġan,
bago ka umalis muna'y magpa-alam
sa kaibigan mo't iyong katunkulan.

(8) (LIHAM SA M̃GA NAG-AASAWA).

M̃ga G. G. Miguel Bantog at
Esther Dalisay.

M̃ga piling kaibigan.

Tangapiu pu nila ang masigabong tua na ambag
niaring loob sa ikaliligaya hangang buhay nang
kanilang malugod na pagiisang puso.

Nguni at kung ikaw naman ay dumating,
katungkulan nilang ikaw ay dalawin,
sapagka't kailangang kanilang sabihing
silay nagsasaya't umuwi kang magaling.

VII

SA MGA PIGING

Kung mapithaya ka sa alin mang piging,
huag kang magpauna sa ibang panauhin;
ngunit huag ka namang mahuling dumating:
isipin mong ikaw ay doon hihintin.

Ninana is ku po ng taimtim sa calooban na abu-
luyan sila ng langit ng saganang biaya.

Na sa panunuyo.

Feliza Ilawdagat

Octubre 15—1906.

(LIHAM SA MGA LUMULUSOK)

G. Jacob Pinkian.

Piling katoto:

Hinahatdan kita ng masayang paonlak dahil sa
paglusok mo sa iyong pinapasukan.

Ninana is kong ikaw ay dumakila sa ikadada-
ngal nitong ating lupang tinubuan.

Sumasa-iyó.

Abdon Sinagaraw

Octubre 15—1906.

(LIHAM SA NAMAMATAYAN)

G. Concepción Panghalina

Mahal na Ginoo:

Uma-anib pu ako ng tunay na pagdamay sa
kahapisang inilagak sa inyo ng kamatayang su-
mamsam ng mahalagang buhay ng inyong nasirang
kapatid.

¡Suma-langit nawa siya!

Mag-utos pu sila.

Alberto Maningas.

Octubre 15—1906.

Sa mesang pagkain kung tumatawag n̄ga,
hayaang mauna ang m̄ga dakilâ;
at gayon din naman huag kang magkusang
maunang tumikim sa alin mang handâ.

Huag kang magmadali't ang subo'y huag lakhan
ang ulam ay huag mong amuyan ó hipan;
ang m̄ga kubierto ay paka-in̄gatan,
upang huag kumatog na lubha sa pangan.

Huag mong titigan ang alin mang hain,
at gayon din naman kasalong panauhin,
pakain̄gatan mo't huag sasambitin
ang bagay na baka nakaririmarim.

Ang iyong m̄ga siko ay huag mong isampa
magpakailan pa man sa kakanang mesa,
kahit anong ulam ay huag humingi ka,
huag namáng pintasan ang kahit alin pa.

(LIHAM SA KAPANĠANACAN)

Ninay na giliw:

Binabati kita n̄g boong tua dahil sa araw n̄g
iyong kapanġanakan. Umaanib ako sa iyong ma-
lugod na kasayahan at ninanais ko n̄g taos sa
puso na lumawig nawa ang iyong huhay sa
gitna n̄g lalong maligayang kapalaran:

Tanggapin mo ang aking masintahing halik.

Ang iyong

Iday.

Octubre 15-1906.

G. CESAR PANGILINAN.

Mahal na Ginoo:

Ikinadadangal ku po ang aking pag-anib sa
inyong malugod na kasayahan, dahil sa malubay
na pagsupling n̄g inyong giliw na asawa.

Ninanais kong ang bagong supling ay lumago,
mamulaklak at magbunga sa ikagiginhawa n̄g bayan.

Na sa pagpipitagan,

Leonardo Tagabundok.

Octubre 15—1906.

Kung di mu man ibig ang dulot na hain,
kahit kakaunti ay kumuha ka rin;
magpakailan pa man ay huag mong sabihing
—“*Ang ganyan pong ulam di ko kinakain.*”

Ang pagsasalita, kung punô ang bibig,
ay bawal na lubos sa dakilang bait,
at gayon din naman ang sadyang pag-gamit
ng dalawang pangâ sa pagkai'y pangit.

Huag mong paapawin ang baso ó copa
ng tubig ó alak at kahit anu pa;
bagu ka umiuom pahiran mu muna
ang iyong mga labi ng laang servilyeta.

Kung maka-inom na ay gayon din naman
ang mga labi mo,y pahirang agapan;
at huag kang umihip wari aliutang,an,
ang gayo,y bawal nga sa dakilang asal.

At kung alayan ka ng iyong kasalo
ng alak ó kaya maging kahit anó,
sa di mu man kanin ay tatanggapin mo
at pasalamatang alay sa iyo.

At kung may dadatal na ibang panauhin,
lalot kakilala'y anyayahang tambing.
Huwag kang sumubo at siya,y iyong hinting
makapasok muna at kayo,y lisanin.

VIII

SA MGA LARO

Kung kayo'y magtipon upanding mag-aliw,
ikaw ay magsayá, ngunit magmahinhin.
Pinaka matanda ay papamiliin
ng larong mainam na inyong gagawin.

Sa alin mang laro ay huag kang magdáya
at huag ka rin namang mag-ingay na lubha.
Kung may alanganin dapat pahatul nga
sa hindi kalarung mga matatanda

At kung may dumating na iyong kaibigan,
ó sinu man kaya, lalu at maraṅgal,
ang ukol sa iyo sa kaniya'y ialay
—“*Ibig pu ba ninyong makipag-aliwan?*”

Sakali at ikaw ay siyang manalo,
sino man ang kulang ay huag singilin mo,
at huag mong sabihing—“*Magbayad po kayo*”
Pahiwatig lamang—“*Ang kulang ay sino?*”.

Isang nananaló'y di dapat umalis,
kung di may malaking dahilang mahigpit;
nguni at ang talo ay makatitindig
at huag magpakita ng kaunting galit.

Kung nananaló ka ay huag kang magdiwang
kung natatalo ka'y huag magngitngit naman,
sa laró'y madalas mahalatang tunay
ang walaug magaling na pinag-aralan.

IX

SA LANSANGAN AT SA LAHAT NG DAKONG UKOL SA MADLA

Babayi'y di sukat lumakad sa daan
ng walang kasama at pangit na tignan;
ngunit sa lalaki ay hindi kailangang
mapag-isa kahit saan mang galaan.

Sa alin mang dako na ukol sa madla
ikaw ay magbihis ng hindi masagwa;
nguni at huag naman ang napaka-dukha,
ó kaya marumi, kung dili may sira.

At kung babayi ka, huag mong pakapalan
mukha mo ng pulbos, pagka't di mainam:
manipis na pahid marikit na tignan,
ang kinang ng balat huag na di maparam.

May iioam kaya sa kulay ng balat
nating kayumangit makinis, maligat?
Pintor at poeta'y iyan ang pangarap
sapagka't nandiyan ang buhay ng dilag.

Paka-ilagan mo ang satsat at daldal,
gayon din ay huag kang magdunung-dunungan;

n̄guni at huag namang parang piping tunay
pagka't ito'y tanda n̄g pagka-walang muang.

Kung may kasama kang dapat na dangalin,
ikaw ay lumagay sa kaliwang piling,
at kung sa banketa'y gumilid kang tambing
sa dako n̄g bakod siya'y padaanin.

Kung masalubun̄an ang isang babayi
sa m̄ga banketa na aking sinabi
ay dapat gumilid ang isang lalaki
ó bumabang saglit, ang gayon ay puri.

Maging kahit sino ang iyong masundan,
kung ibig mong siya'y iyong malampasan,
ikaw ay bumaba ó gumilid lamang,
sa dako n̄g bakod ay huag kang magdaan.

Kung ang kasama mo ay may maka usap
na wari ay lihim, lumayo kang agad,
upang huag sabihing nakikitalastas
ka n̄ga sa usapang di dapat mahayag.

Kung kayo ay tatlo sa m̄ga galaan
ay igitna ninyo ang itinatahal,
n̄guni at kung kayo'y magka isang dangal,
magka-kulay damit sa tabi ay bagay.

At gayon din naman ang magkasintaas,
sa dalawang tabi sila nararapat,
ang isang mababa ó kaya matankad
ay siyang igitna, ang gayon ay sukat.

Kailan̄an n̄gang lubos na iyong isabay
sa m̄ga kasama ang iyong paghakbang
kung kayo'y titigil, ang iyong katawan
at ulo'y itayó n̄g anyong mainam.

Kung sa m̄ga pintô ikaw ay papasok,
hakban̄an ó landas na sadyang makipot,
kung may kasama kang dapat na ilusok,
paunahin siya't ikaw ay sumunod.

Sa m̄ga karnage at m̄ga kalesa
kung kayo'y sasakay ay huag kang mauna;

sa piling na kanan paupuin siya,
sa dakong kaliwa doon lumagay ka.

Nguni at kung kiles aug inyong sasakyan
lalut apat kayo'y huli ka rin naman;
sila'y paupuin sa dakong unahan,
sa tabi ng pinto doon ka lumagay.

Paghintu na ninyo at kayo'y bababâ,
ikaw ay maunang umibis na kusa.
kung siya'y babayi ó kaya matandâ,
agad mong abutin alalayang lubha.

Babayin tumindig sa kaniyang upuan
at anyong aalis, may paroroonan,
ang iyong pagsuyo pagdaka'y ialay:
"Ikadadangal kong kayo po'y samahan"

Ito'y kagawian sa asal dakila,
maging sa dulaan, maging sa pag-gala,
maging sa pagkain kung uupu na ngâ,
sumaliw sa piano ó tumugtug kaya

Pagka't sa babayi'y pagdusta ngang tunay
ng isang lalaki kung hindi samahan;
kaya,t ang babayi'y nararapat namang
lalaki'y huag hiyain at pasalamatan.

At kung hindi gayo'y mapipintasan ka,
mangmang na babayi, walang munting sigla.
para kang babayin bundok na talaga,
sa ugaling bayan ay di pa bihasa.

Huag mong gagayahan ang mga pintasin
ang balang makita'y agad susukatin:
gumagawa nito'y iyong mga haling
na hindi nag-aral ng pagka-mahinhin.

Kung paparoon ka sa mga sayawan,
sa mga teatro't mga kapisanan,
pakatandaan mong iyong katunkulan
ang lalong mabining pagkamatimtiman.

Sa alin mang bagay na sadyang di pangit
ay huag mong hiyain ang sino man kahit;

magbigay loob ka, sa di mo man ibig,
upang purihin ka ng mga mabait.

Alin mang Religion ay huag mong tawanan,
mga dasal nila ay pagpitaganan.
Ang mga ugali sa alin mang bayan
gayon din ay dapat na iyong igalang.

Ang sa protestanteng ginagawang kulto,
at ang kay Mahoma, at ang kay Confucio,
at ang sa Iglesia Filipinang bago
ay iyong igalang, sampu ng Romano.

Ang ugaling moro, ang ugaling insik,
ang sa amerikano, ang sa mga ingles,
kastila, t aleman, ang sa taga bukid
at kahit alin pa, y igalang mong tikis.

Ang iyong Religion ay kahit alin man
at ang iyong ugali, y dalisaying tunay:
hayaan ang iba, t huag ipagputakang
lahat ay masama, t ang iyo'y mainam.

X

SARISARING BAGAY NA DAPAT SUNDIN

Sa harap ng iba ay huag kang magbihis,
magputol ng kuko, maghilod, mag-ahit,
huag kang magpabahin, magpunas, magwalis
at ang magpapatok ng daliri, y pangit.

Bawal na totoo sa dakilang asal
sa harap ng iba'y makipagbulungan;
nguni at lalu pang kasama-samaan
ang nakikibasa sa bukás na liham.

At gayon din naman ay masamang lubos
ang sa sumusulat kusang panonood;
ang sa nag-uusap naman ay manubok
ay pangit na lubha at asal na buktot.

Sa harap ng iba ay huag kang bumahin
ng napakalakas, sapagka't pangit din.
Ang labi mut kukó ay huag mong kagatin,
ang mga paa mo'y huag pakinigin,

Huag inong gagayahan ang asal mababa
n̄g sa bawa't bigkas, isang panunumpa
ang m̄ga mahalay salitang salaula
na gaya n̄g—*Kulog!* . . . ay kahiya—hiya.

Magmatimtiman ka sa m̄ga harapan,
ang masayang mukha'y lubos na kailan̄gan:
ikaw ay n̄gumiti n̄g maminsan-minsan
at kung matawa ka ay huag mong lakasan.

Kung nakatayu ka't may kakaharipin,
ay huag kang sumandal sa pinto ó dingding;
ang m̄ga kamay mo'y huag may butingtingin,
ang dalawang paa'y itayong butihin.

Kung naka-upu ka'y ang iyong m̄ga hita
ay huag pagpatun̄gin sapagka't pangit n̄ga,
at huag mu rin namang paunating lubha
ang iyong m̄ga paa sa may dakong gitna.

Sa usapang di mo lubos nalilining,
ay huag kang sumisid n̄g lubhang malalim:
ikaw ay pumakli, kung bagat may dahil;
ang bawat bigkás mo'y timban̄ging magaling.

Ang kahima,t sino,y huag mong pagmamasdang
parang sinisiyasat: ang gayon ay bawal;
n̄guni,t titingnan mong sandali kung minsan,
ng di parang iyong pinagmamalakhan.

Pintasan ang m̄ga birong matutulis,
n̄guni at kailan̄gan ang huag kang magalit:
kung di magsitigil, ay huag kang dumin̄gig,
humanap n̄g ibang iyong makaniig.

Ang ganda n̄g iba,y huag mong kaingitan,
at gayon din naman ang sa ibang yaman;
subali kung siya kay sa iyo,y mainam,
ay ipagtapat mong mainam siyang tunay.

KATAPUSAN

MABUTI ANG BATANG MAY DAKILANG ASAL
KAY SA MATATANDANG WALANG NAMUMUAN̄GAN
DAKILA ANG DUKHANG MAY UGALING MAHAL
KAY SA WALANG TUTONG M̄GA MAYAYAMAN.



IMPRENTA "TAGUMPAY"

Tumátangáp ng lahat ng
gawaing nauukol sa

LIMBAGAN

Sa lalong mababang
halagá at mada-
ling panabón.

PAGAWAAN NG MGA MANLILIMBAG NA FILIPINO

Gayon din ng
lahat ng bagay
na nauukol sa

LIBRUHAN

Ang mga kasangkapan
at yari ay pawang pang-
kasalukuyan.

Liwasan nang Sta. Cruz, Bl. 15

MAYNILA

UNIVERSITY OF MICHIGAN



3 9015 05228 7227

